



NEGERI PAHANG

TAMBAHAN PERUNDANGAN

AKTA KERAJAAN TEMPATAN 1976

PHG. P.U. 7/2000

UNDANG-UNDANG KECIL KEDAI GUNTING RAMBUT DAN PENDANDAN RAMBUT (MAJLIS DAERAH PEKAN) 2000

Tarikh penyiaran :
Tarikh berkuatkuasa :

13 Februari 2000
13 Februari 2000

SUSUNAN UNDANG-UNDANG KECIL

Mukadimah

- Undang-Undang Kecil 1. Nama, pemakaian dan mula berkuat kuasa.
- Undang-Undang Kecil 2. Tafsiran.
- Undang-Undang Kecil 3. Lesen, Fee dan pemeriksaan.
- Undang-Undang Kecil 4. Kebersihan premis dan perkakas.
- Undang-Undang Kecil 5. Bekalan air panas dan sejuk.
- Undang-Undang Kecil 6. Bekas bagi tuala kotor dan buangan tred.
- Undang-Undang Kecil 7. Kehendak kebersihan yang mesti dipatuhi oleh pendandan rambut.
- Undang-Undang Kecil 8. Tuala muka dan fabrik-fabrik lain.
- Undang-Undang Kecil 9. Sabun untuk cukuran.
- Undang-Undang Kecil 10. Cawan cukuran.
- Undang-Undang Kecil 11. Span tidak boleh digunakan.
- Undang-Undang Kecil 12. Memberhentikan keluar darah.
- Undang-Undang Kecil 13. Penyakit-penyakit berjangkit dan menular.
- Undang-Undang Kecil 14. Membasmi kuman dari alat-alat.
- Undang-Undang Kecil 15. Meludah.
- Undang-Undang Kecil 16. Binatang dilarang masuk.
- Undang-Undang Kecil 17. Salinan Undang-Undang Kecil hendaklah dipamerkan dalam kedai gunting rambut.

Mukadimah

PADA menjalankan kuasa yang dijalankan oleh seksyen 102 Akta Kerajaan Tempatan 1976 [Akta 171], Majlis Daerah Pekan membuat, dan menurut seksyen 103 Akta tersebut Pihak Berkuasa Negeri mengesahkan, undang-undang kecil yang berikut:

1. Nama, pemakaian dan mula berkuat kuasa.

(1) Undang-Undang kecil ini bolehlah dinamakan **Undang-Undang Kecil Kedai Gunting Rambut dan Pemandan Rambut (Majlis Daerah Pekan) 2000** dan hendaklah dipakai hanya bagi kawasan Majlis Daerah Pekan.

(2) Undang-Undang Kecil ini hendaklah mula berkuatkuasa pada tarikh ia disiarkan dalam *Warta*.

2. Tafsiran.

Dalam Undang-Undang Kecil ini, melainkan jika konteksnya menghendaki makna yang lain-

“dandan rambut” termasuk potong rambut, kerinting rambut potong kemas, mencelup, mencukur, mensyampu dan tiap-tiap kerja seumpama itu yang biasanya dilakukan oleh seseorang pendandan rambut samada dengan tangan, dengan alat, dengan elektrik atau dengan menggunakan apa-apa serbuk atau larutan atau dengan apa-apa kombinasi cara-cara itu;

“kedai gunting rambut” termasuk sesuatu kedai pendandan rambut dan tiap-tiap salun dan semua premis yang di dalam atau di atasnya urusan dandanan rambut dijalankan;

“larutan disinfektan” ertinya larutan apa-apa disinfektan yang sama kekuatan racun kumannya dengan 5% larutan asid karbolik;

“pendandan rambut” termasuk seorang penggunting rambut dan (semasa orang itu menjalankan kerja berkaitan dengan pendandan rambut dalam kedai gunting rambut) seorang pekerja pendandan rambut;

“Yang Dipertua” ertinya Yang Dipertua, Majlis Daerah Pekan dan termasuk Timbalan Yang Dipertua.

3. Lesen, Fee dan pemeriksaan.

(1) Tiada suatu premis boleh digunakan sebagai kedai gunting rambut melainkan jika premis itu dilesen oleh Yang Dipertua.

(2) Sesuatu lesen melainkan jika ianya digantung atau dibatalkan terlebih awal, adalah sah sehingga 31 Disember berikutan dari tarikh bermulanya lesen itu, tetapi, boleh diperbaharui pada atau sebelum 31 Disember tiap-tiap tahun.

(3) Tiap-tiap orang yang berkehendakkan lesen atau pembaharuan lesen hendaklah membuat permohonan secara bertulis kepada Yang Dipertua.

(4) Fee yang kena dibayar bagi suatu lesen ialah seperti berikut:

- | | |
|------------------------------------|----------|
| (i) Tidak melebihi 3 buah kerusi | RM 15.00 |
| (ii) Antara 4 hingga 6 buah kerusi | RM 30.00 |

(iii) Antara 7 hingga 15 buah kerusi	RM 100.00
(iv) Antara 15 hingga 20 buah kerusi	RM 200.00
(v) Melebihi 20 buah kerusi	RM 300.00

(5) Jika sesiapa telah memulakan perniagaan sebelum lesen diluluskan bayaran tidak melebihi 10 kali ganda bayaran lesen seperti yang dinyatakan dalam Undang-undang Kecil ini akan dikenakan selain daripada bayaran lesen biasa yang dikenakan di bawah undang-undang kecil ini.

(6) Yang Dipertua hendaklah menyimpan suatu daftar semua permohonan untuk mendapatkan lesen atau memperbaharui lesen.

(7) Dalam masa sesuatu lesen itu masih berkuatkuasa Yang Dipertua boleh, permohonan pemegang lesen itu, membenarkan supaya lesen itu dipindah milik kepada seorang lain.

(8) Tiap-tiap pendandan rambut yang menjalankan perniagaan atau urusan pendandan rambut atau menjaga atau diambil bekerja di premis di mana urusan itu dijalankan hendaklah membenarkan Yang Dipertua atau mana-mana orang yang diberi kuasa dengan sewajarnya olehnya memasuki premis itu pada bila-bila masa yang menasabah tanpa notis dan memeriksa mana-mana bahagian premis itu dan tiada sesiapa boleh menghalang atau membenarkan orang itu dihalang daripada membuat pemeriksaan itu.

4. Kebersihan premis dan perkakas.

Premis tiap-tiap kedai gunting rambut, perkakas, perabut dan alatnya hendaklah pada setiap masa diselenggara dalam keadaan baik dan berada di dalam keadaan yang sungguh bersih.

5. Bekalan air panas dan sejuk.

Bekalan air panas dan sejuk yang cukup hendaklah diadakan terus-menerus di tiap-tiap kedai gunting rambut semasa dibuka untuk urusan.

6. Bekas bagi tuala kotor dan buangan tred.

Tiap-tiap kedai gunting rambut hendaklah mengadakan sekurang-kurangnya dua bekas yang sesuai yang bertudung rapat, yang ke dalam satu daripadanya hendaklah dimasukkan semua tuala kotor dan kain-kain kotor lain selepas sahaja digunakan dan ke dalam yang satu lagi hendaklah dimasukkan semua keratan rambut dan lain-lain buangan tred dengan seberapa segera yang praktik selepas melayan seorang pelanggan.

7. Kehendak kebersihan yang mesti dipatuhi oleh pendandan rambut.

(1) Sebelum melayan seseorang pelanggan, tiap-tiap pendandan rambut hendaklah mencuci tangannya dengan sesungguhnya, dengan menggunakan sabun dan air bersih, dan bila perlu menggunakan beras kuku.

(2) Semasa melayan seseorang pelanggan, tiap-tiap pendandan rambut hendaklah memakai kot atau overall yang bersih dan padan yang berwarna putih atau berwarna lembut diperbuat dari kain yang boleh dibasuh.

(3) Tiap-tiap pendandan rambut hendaklah menjalani pemeriksaan doctor setahun sekali.

8. Tuala muka dan fabrik-fabrik lain.

(1) Tuala muka, pelindung leher, tuala leher dan fabrik-fabrik lain secara langsung menyentuh kulit seseorang pelanggan yang diuntukkan bagi pelanggan itu hendaklah baru dan bersih.

(2) Tuala muka hendaklah direndam dalam air mendidih atau diwap selama sekurang-kurangnya 5 minit dan kemudian dibasuh sebelum digunakan pada tiap-tiap pelanggan.

9. Sabun untuk cukuran.

Apa-apa sabun selain daripada sabun cecair atau krim cukuran atau serbuk cukuran tidak boleh digunakan bagi maksud membuat buih bagi mana-mana pelanggan yang menghendaki cukuran.

10. Cawan cukuran.

Cawan yang digunakan untuk mengisi air bagi membuat buih untuk cukuran hendaklah dikosongkan selepas sahaja digunakan bagi tiap-tiap pelanggan dan dicuci sepenuhnya dengan air mendidih.

11. Span tidak boleh digunakan.

Span atau puff bedak tidak boleh digunakan ke atas pelanggan.

12. Memberhentikan keluar darah.

Keluar darah hendaklah diberhentikan hanya dengan suatu stiptik yang sesuai yang hendaklah digunakan ke atas seorang pelanggan sahaja dan hendaklah selepas sahaja digunakan dimasukkan ke dalam bekas yang disediakan untuk buang tred.

13. Penyakit-penyakit berjangkit dan menular.

(1) Mana-mana orang yang mengidap apa-apa penyakit berjangkit atau menular, atau apa-apa ruam atau letusan berjangkit atau menular di muka, leher atau kulit kepala hendaklah memberitahu pendandan rambut tentang adanya penyakit, ruam atau letusan itu sebelum ia membiarkan, kerja mendandan rambut dijalankan ke atas dirinya.

(2) Tiap-tiap pendandan rambut, apabila diberitahu sedemikian atau apabila mendapat tahu secara lisan bahawa seseorang itu mengidap apa-apa penyakit berjangkit atau menular hendaklah, semasa melayan orang itu, menggunakan alat-alat berasingan yang diasingkan untuk digunakan khas bagi orang-orang itu hendaklah selepas sahaja digunakan direndam alat-alat dalam suatu larutan disinfektan selama sekurang-kurangnya 5 minit. Semua tuala, kain, atau fabrik lain yang digunakan ke atas orang itu atau kot atau overall yang dipakai oleh pendandan rambut itu hendaklah selepas sahaja digunakan dimasukkan dalam suatu larutan disinfektan atau dalam air mendidih selama sekurang-kurangnya 10 minit.

(3) Seseorang pendandan rambut yang mengidap apa-apa penyakit berjangkit atau menular atau apa-apa ruam atau letusan kulit berjangkit atau menular tidak boleh melayan mana-mana pelanggan.

14. Membasmi kuman dari alat-alat.

(1) Tiap-tiap pendandan rambut hendaklah menyebabkan supaya semua kelengkapan bagi kegunaan am yang tersebut di bawah ini dibasmikan kuman mengikut cara yang ditetapkan atau dengan cara pembasmian kuman melalui diangan lampu ungu yang diluluskan oleh Yang Dipertua.

(a) pisau cukur, gunting dan sikat-rendamkan selama sekurang-kurangnya 3 minit dalam larutan disinfektan;

(b) perepang (clipper)- mula-mula berus sepenuhnya gigi-gigi dengan suatu berus yang bersih dari kuman untuk membuang semua rambut dan kemudian lap gigi-gigi itu dengan sekeping kain yang telah dicelup dalam larutan disinfektan;

(c) berus rambut-rendamkan bahagian bulu atau bulu keras selama sekurang-kurangnya 3 minit dalam larutan disinfektan yang sesuai dan kemudian keringkan berus itu dalam ruang udara panas;

(d) berus cukur-apabila suatu berus baru hendak digunakan, rendamkan bahagian bulu keras dalam larutan formalin 10% selama sekurang-kurangnya 30 minit dan selepas itu bilas dalam air bersih, Apabila hendak digunakan lagi kemudiannya, rendamkan bahagian bulu atau bulu keras dalam air mendidih selama sekurang-kurangnya 3 minit tetapi jika bulu keras itu diperbuat daripada apa-apa bahan sintetik, memadaih membasuhnya dengan sabun dan air.

(2) Semua kelengkapan yang tersebut dalam perenggan (1) hendaklah dibasmikan kuman mengikut cara yang dinyatakan dalam perenggan itu sebelum digunakan tiap-tiap hari dan selepas sahaja digunakan ke atas tiap-tiap pelanggan.

15. Meludah.

Tiadaa seorang pun boleh meludah ke lantai atau dinding kedai gunting rambut.

16. Binatang dilarang masuk.

Tiada seorang pun pendandan rambut boleh menyebabkan atau membenarkan apa-apa binatang masuk atau tinggal dalam kedai gunting rambut.

17. Salinan Undang-Undang Kecil hendaklah dipamerkan dalam kedai gunting rambut.

Suatu salinan Undang-undang Kecil ini, yang diletakkan ke dalam frame yang sesuai hendaklah pada setiap masa dipamerkan dengan cara yang mudah dilihat dalam tiap-tiap kedai gunting rambut dan hendaklah sentiasa dijaga dalam keadaan bersih, bolehlah dilihat dan boleh dibaca.

Diperbuat 7 Oktober 1994.

ABDUL MALEK BIN HAJI ABDUL MAJID,
Yang Dipertua,
Majlis Daerah Pekan

Disahkan 24 Mei 1995.
[SUK.PHG.(KT) 5602 SJ. 2]

MOHAMAD NOOR BIN ABDUL RANI,
Setiausaha,
Majlis Mesyuarat Kerajaan